

Kapítulo 10

DOKTRINA DI HESUS, SPIRITU SANTU I SATANAS

E kapítulo aki lo trata ku doktrina mormon tokante tres pèrsona, Hesus, Spiritu Santu, i Satanas.

I. DOKTRINA DI HESUS

Nos lo a pensa ku un religion ku ta karga nòmber di e Iglesia di *Hesukristo* lo duna un lugá prominente na e di dos Pèrsona di e Trinidat den nan siñansa. Ma esei no ta e kaso. Pa mormonnan, Hesus ta solamente un entre hopi dios. Hosé Smith ta mas importante pa nan ku Hesukristo. Nan no por pèrmití pa Hesus tin prioridat den bida di nan miembronan na lugá di Hosé Smith. Pues, en realidat, e ta iglesia di *Hesukristo* pa nòmber so! I si nos paga bon tinu na e siñansa mormon tokante e pèrsona di Hesus, nos ta realisá rápidamente ku nan Hesus no ta e mésun Hesus di Beibel. Nota algun di nan siñansa tokante Hesus:

A. Hesus Su Pre-Eksistensia

Promé ku Hesus a nase den e mundu aki, El a eksistí komo un spiritu, méskos ku a sosodé ku tur otro hende. Su nòmber den Su estado spiritual pre-eksistente tabata Yehova, Yu di Elohim (esta, Yu di Dios Tata).¹ "Entre e yunan spiritu di Elohim, e primogénito tabata Yehova òf Hesukristo pa ku ken tur otro ta ménos..."² E mésun outor ta agregá: "Hesukristo no ta Tata di spiritunan ku a haña kaba òf ku lo haña kurpanan riba e mundu aki, pasobra E mes ta un di nan. E ta E Yu méskos ku nan ta yunan hòmer i muhé di Elohim."³

Di e sitanan aki por nota ku Hesus (Yehova) ta inferior ku Dios Tata (Elohim). Tambe ta notabel ku e úniko diferencia entre Hesus i otro yunan pre-eksistente di Elohim (esta hende), ta ku Hesus ta e promé yu di Elohim. E otro spiritunan di hende pre-eksistente a nase despues di Hesus.

Segun e Santunan di e Deláster Dianan, Yehova (Hesus) a krea-reorganisá mundu bou di direkshon di Elohim (Dios Tata) huntu ku hopi otro dios i spiritu humano pre-eksistente.

B. Hesus i Lúsifèr Tabata Ruman Pre-Eksistente

Mormonnan ta kere ku Dios Tata a engendrá tur hende ku ta i lo eksistí den e mundu aki. E ta igualmente Tata di Hesus komo di Lúsifèr (esun ku a bira Satanas), i pues Hesus i Satanas ta ruman. "En kuantu di Diabel i su spiritunan kompínchi, nan ta ruman di hende i tambe di Hesus i yunan hòmer i muhé di Dios den e mésun sentido ku nos ta."⁴

C. Hesus Su Divinidat

Hesus Su divinidat no ta úniko segun e Santunan di e Delaster Dianan. Nan ta kere ku tin hopi dios, no un Trinidat. Hesus a bira un dios despues di Su eksistensia den mundu. Pues

Hesus ta solamente un den hopi dios. Por bisa ku Hesus no ta niun tiki diferente for di hende, komo ku hende tabatin un pre-eksistensia méskos ku Hesus, i nan tambe tin e oportunitat di yega na divinidat méskos ku Hesus.

Segun mormonnan, Hesus ta distinto di otro hende pasobra físikamente E so tin un mama humano i un Tata divino.

D. Hesus Su Nasementu

Iglesia mormon ta nenga ku Hesus a nase pa medio di poder di Spiritu Santu—loke tantu Beibel (Mateo 1:18,20; Lukas 1:35) komo e *Buki di Mormon* ta bisa kla: "I ata, e lo nase di Maria, na Herusalèm ku ta den tera di nos tatanan, e siendo un birgen, un wea prezioso i skohí, ku lo ta sombrá i konsibí pa medio di poder di Spiritu Santu, i duna lus na un yu hòMBER, si, na e Yu di Dios" (Alma 7:10).

En kontraste, Brigham Young a bisa: "Kòrda for di e tempu awor aki i pa semper, ku Hesuskristo no a wòrdu engendrá pa medio di Spiritu Santu."⁵ Joseph Fielding Smith a siña: "Nan ta bisa nos ku e *Buki di Mormon* ta bisa ku Hesus a wòrdu engendrá pa Spiritu Santu. Mi ta bisa ku 'no.' *Buki di Mormon* no ta siña algu asina! Ni Beibel tampoko."⁶ Mormonnan ta kere ku si Hesus a nase pa poder di Spiritu Santu, lo E ta Yu di Spiritu Santu na lugá di Yu di Dios Tata.

Beibel ta bisa ku birgen Maria a konsibí milagrosamente. Ma teólogonan mormon ta konvensé ku e konsepshon di Hesus por a resultá solamente di un akto físico. Maria tabatin relashon seksual ku e ser *físiko* Dios Tata (Elohim). Pues e nasementu di Hesus no tabata milagroso. Joseph Fielding Smith Jr. a kirbi: "E nasementu di e Salbador tabata un evento natural sin niun grado místiko, i e Tata Dios tabata e mayor literal di Hesus tantu den karni komo den spiritu."⁷ Apòstel Bruce R. McConkie a agregá: "Kristo a wòrdu engendrá pa un Tata Inmortal mésun manera ku hende mortal ta engendrá pa nan tatanan mortal."⁸ Brigham Young a deklará:

"Ora tempu a yega pa Su primogénito, e Salbador, lo bin den mundu...e Tata mes a bin i a faboresé e spiritu ei ku un tabernákulo (kurpa) na lugá di laga kualke otro hòMBER hasi'è."⁹

Joseph Fielding Smith a afirmá:

"Nos Tata na Shelu ta Tata di Hesuskristo, tantu den spiritu komo den karni...Mi ta kere firmemente ku Hesuskristo ta e Uniko Yu Engendrá di Dios den karni...Kristo a wòrdu engendrá pa Dios. E no a nase sin ayudo di Hende, i e Hende ei tabata Dios."¹⁰

Dios Tata, segun doktrina mormon, tin hopi esposa. Maria tabata un di nan. Maria tambe tabatin mas ku un esposo, Hosé, i tambe Dios Tata. Brigham Young a deklará ku "E hòMBER Hosé, esposo di Maria, segun nos sa, no tabatin mas ku un esposa, pero Maria, esposa di Hosé, tabatin un otro esposo."¹¹ E apòstel mormon, Orson Pratt, a rasoná:

"E kurpa di karni di Hesus a eksigí un Mama i un Tata. P'esei, e Tata i Mama di Hesus, segun karni, mester a asosiá huntu ku otro den e kapasidat di Esposo i Esposa; pues e Birgen Maria mester tabata, pa un tempu, e esposa legal di Dios Tata."¹²

Si di bèrdat Hesus tabata konsibí pa relashon seksual entre Dios Tata i Maria, anto mormonnan ta desonesto pa afirmá ku Hesus a nase di *birgen* Maria; Maria no tabata birgen mas.

E. Hesus Tabata un Poligamista

Mormonnan ta sigur ku Hesus tabata kasá. Nan ta siña ku un pèrsona no por bira un dios si e no a kasa; e por bira un angel so (*Doktrina i Aliansanan* 132:19-20). Komo ku Hesus a yega na divinidat, ta mas kla ku di dia anto (pa mormonnan) ku Hesus mester tabata kasá. Apòstel Orson Hyde a skirbi:

"...un tempu tabatin un kasamentu na Kana di Galilea...Hesukristo a kasa na e okashon ei."¹³

Ma mormonismo ta bai mas leu. Nan ta siña ku Hesus tabatin mas ku un esposa. Orson Hyde i Orson Pratt ta agregá:

"...mi a bisa den mi lektura tokante matrimonio, na nos último Konferensia, ku Hesukristo a kasa na Kana di Galilea, i ku Maria, Marta, i otronan tabata su esposanan, i ku el a engendrá yunan."¹⁴

"...e gran Mesias ku ta fundadó di e religion kristian, tabata un poligamista,...e Mesias a skohe...pa e mes kasa ku hopi esposa onrado, pa muestra na tur generashon den futuro ku e ta aprobá e pluralidat di esposa bou di e dispensashon kristian..."¹⁵

Jedediah M. Grant, segunda konsehero di Brigham Young, ta opiná ku Hesus a wòrdu krusifiká pa kousa di poligamia:

"E motibu prinsipal pa e eksploshon di sintimentu di maldishon kontra Kristo i su disipelnan, kousando su krusifikshon, evidentemente tabata basá riba poligamia... Kreensia den e doktrina di pluralidat di esposanan a kousa e persekushon di Hesus, i su siguidó nan."¹⁶

Tambe mormonnan ta siña ku Hesus lo biba den un estado di poligamia pa tur etèrnidat, méskos ku su Tata.

"...tantu Dios Tata i nos Señor Hesukristo lo eredá nan esposanan den etèrnidat méskos ku den tempu;...lo ta un shòk pa ku e modestia di e damanan hopi deboto di kristianismo pa mira Abraham i su esposanan, Jakob i su esposanan, Hesus i su esposanan onrado, tur kome huntu na e mèsun mesa..."¹⁷

F. Hesus Tabatin Yunan

Mormonnan ta insistí tambe ku Hesus tabatin yunan...pa E por kumpli ku Isaias 53:10 "E lo mira Su desendientenan."

"Hesukristo tabata kasá pa E por mira Su simia promé ku nan a krusifik'E. Lo mi bisa aki ku promé ku e Salvador a muri El a mira riba Su propio yunan natural méskos ku nos ta mira riba esnan di nos."¹⁸

G. Hesus ta un Hende ku a Bira un Dios

Beibel ta siña ku Hesus, siendo Dios, a bira hende. Mormonnan alkontrario ta kere ku Hesus, siendo hende, a bira un di e hopi diosnan. E mester a proba su dignidat dor di obedensia i deboshon den un kurpa físiko humano pa e por bira un dios—loke nos tur tambe por hasi.

II. DOKTRINA DI SPIRITU SANTU

E Iglesia di Hesuskristo di e Santunan di e Deláster Dianan ta siña ku tantu e Tata komo e Yu tin un kurpa. Skritura mormon, ta afirmá: "E Tata tin un kurpa di karni i wesunan ku bo por fula manera esun di hende; e Yu tambe; ma Spiritu Santu no tin un kurpa di karni i wesunan, ma ta un pèrsonahe di Spiritu" (*Doktrina i Aliansanan* 130:22).

E Santunan di e Deláster Dianan ta insistí ku ta impusibel pa un pèrsona bira un dios sin un kurpa físiko. Tambe e mester ta kasá, i e no por kasa si e no tin kurpa. Un otro kreensia mormon ta ku "...un kurpa inmaterial no por eksistí..."¹⁹ Nos lo a pensa ku mormonismo lo a yega na konklushon ku pasobra Spiritu Santu nunca a bin na mundu i proba su mes komo un ser mortal, ta impusibel ku Spiritu Santu por ta Dios, i ku di bèrdat e no por eksistí mes.

Apesar di esaki, mormonismo ta kontradisí su mes doktrinanan i ta siña ku Spiritu Santu ta Dios. Nan ta kere ku tin tres pèrsona den e Divinidad: Tata i Yu ku ta pèrsonanan ku kurpanan físiko, i Spiritu Santu ku ta un pèrsona di spiritu—un ser inmaterial, un líkido divino. "Spiritu Santu ta un pèrsonahe di Spiritu, i ta forma e di tres pèrsona di e Divinidad."²⁰ E mésun outor a skirbi "Spiritu Santu ta un pèrsona. En kontraste di e Tata i e Yu ku tin kurpanan di karni i wesu, Spiritu Santu no tin un kurpa di karni i wesu...ma ta un pèrsonahe di spiritu."²¹ Sinembargu, siendo Dios, mormonismo no ta kere ku Spiritu Santu ta omnipresente.

Mormonnan tambe ta siña ku un parti di e kastigu ku diabel i su kompínchinan a sufri pa motibu di nan piká ta ku nan no por haña un kurpa. Segun e rasonamentu aki, mester konkluí ku Spiritu Santu tambe ta sufri pa motibu di su piká.

Mormonnan no ta onesto pa afirmá dos doktrina kontradiktorio. Ta klaro ku e doktrina mormon tokante Spiritu Santu ta un siñansa hopi bruhá i kontradiktorio. En kontraste Beibel ta siña kla ku Dios ta un Ser spiritual (Juan 4:24) i ku Spiritu Santu ta Dios (Echunan 5:3-4; II Korintionan 3:18) i komo un pèrsona E tin un pèrsonalidad: mente (Echunan 15:28), boluntat (Echunan 16:7), i emoshon (Efesionan 4:30).

III. DOKTRINA DI SATANAS

Iglesia mormon ta siña ku tantu Hesus komo Lúsifèr (nòmber di e ser ku a bira Satanás) ta yunan ku Dios Tata a engendrá seksualmente, i pues nan tabata ruman di spiritu.

Segun e Buki di Moises 4:1-4, ora konsilio di diosnan tabata plania di manda un salvador na mundu, Hesus i Lúsifèr a pleita dilanti e konsilio pa e privilegio di ta e salvador.

"Hesus a bisa ku siertu alma lo no ta salvá; i diabel a bisa ku e lo salba nan tur, i a splika su plan na e konsilio supremo..."²²

Lúsifèr a spera ku e lo ta skohí i a bisa: "Ata mi aki, mandámi, lo mi ta bo yu, i lo mi redimí tur hende, pa ni un alma bai pèrdí, i siguramente lo mi hasié; p'esei duná mi bo onor" (Moises 4:1)

Mayoria di e konsilio di diosnan a vota na favor di Hesus. E *Pèrla di Gran Preis* ta aklará e motibu ku e konsilio di diosnan a vota kontra Lúsifèr. Lúsifèr tabata ke kita e boluntat liber di hende: "P'esei, pasobra Satanás a rebeldiá kontra mi, i a buska di destruí e boluntat liber di hende, ku ami, Señor Dios, a dun'é..." (Moises 4:3).

Ku rabia i yalusí pa ku Hesus, Lúsifèr a rebeldiá kontra e desishon di e konsilio i p'esei a bira diabel. Tambe el a hala un tersera parti di e otro rumannan den su rebelion kontra e desishon di e konsilio, i nan a bira demonionan.

-
- 1
 - 2
 - 3
 - 4
 - 5
 - 6
 - 7
 - 8
 - 9
 - 10
 - 11

12
13
14
15
16
17
18
19
20
21
22